

**Naul nga Pol Muli Womue
tevi
TIMOTI
Batu nale nga mivsivseni lut
nga parmeteni naul ngel
puto suri**

Timoti tasu sen evi nesen Isrel san nga mivi kele kalesia, ko tata sen evi ñeri Gris. Ko etipatun majingen sen nga ñimajing tevi Pol daron nga mivi ñelakel malume. Pol oli naul ngel nga rramveruse 1 Timoti tevi Timoti daron nga ni mokmetmete kalesia nir ie Epesas. Pol owra Timoti puwer ore nevisvisenien gerisen nga jinibb sopor marok-visviseni ie. Ko ospe kele suri lat nga marlot muto suri, ko lat nga kalesia liken ser puto suri renge devjen sopor kele.

Pol owra erres tevi Timoti

¹ Inu Pol, nuvi aposol se Iesu Kristo suri nale se Atua nga ñilai mauren tevi kerr, ko Iesu Kristo Numal se kerr nga rramok-teravi. ² Nuwrai ‘erres’ tevi nik Timoti. Kurpe natuk woswos renge kalesia nir. Ko ngel evi loten suk, nga merrenien, netlasien, ko demat se Atua Tata ko Numal se kerr Iesu Kristo piptevim.

Pol owra puwer ore nevisvisenien gerisen

³ Erpe mowrai pa musuw tevim daron nga ñelinglingim nga bean Masetonia, numrreni nik

kuplik ko wor Epesas, nga kupwer ore nir nga marok-visviseni gerisen nir. ⁴ Ko kupwerai tevi nir nga nir parlinglingi tutunmasa gerisen ser ko naul nga marpepriv lenglengen ne nise metka ser nir. Daron nga marmeteni nanu ngok nir, ko arpapal elep. Ko marongen se Atua sete orongwos piplari renge nanu ngok nir. Eplari kobbong renge nosurien se jinibb nir. ⁵ Ko Atua owrai kerr rrap̄elak tweni merrenien nga miplari renge nalol nga muwokwok m̄irres, ko nga sete mubbujbbuj suri nanu nga marsij nga rramlolir, ko renge nosurien nga mivi were-tunen. ⁶ Jinibb sopor arlinglingi pa murrun ngok nir ko arsarr pa renge nale nawon. ⁷ Nir arwera arongrongwos elep suri nale nesesreien se Atua, ko arok-rij eterter erpe norongwosien ser mutoe kobbong. Ko setete arongwose suri murru nale nga marok-werai.

⁸ Ko rramrongwose erres nga nale nesesreien se Atua erres poro parrul totkoni renge sel momsawos nen. ⁹ Ko tetajer rraprongwose nga nale nesesreien sete eplari tweni jinibb nga marres kobbong, ko purrul totkoni ma jinibb nga marok-tor otvi nale, ko jinibb nga marok-loli batur, ko jinibb nga sete marosuri Atua, ko jinibb nga marok-loli nololien nir, ko jinibb nga sete marvijuri sel se Atua ko sete marok-rrorrm̄i Atua nabong sapon, ko jinibb nga marok-revji pini tata ser ko tasu ser, rreknga marok-revji pini jinibb lele. ¹⁰ Ko evi nga purrul totkoni norman nga sete puloli p̄isij tevi nesevin, ko nesevin nga sete puloli p̄isij tevi norman, ko norman nga

sete puloli ñisij tevi norman pirpok kele. Ko evi kele nga purrul totkoni nir nga marok-venae jinibb, ko nir nga markerkeris, ko nir nga marlai nale gerisen re nosþen se numal nir, ko nir nga marloli murrun mñinij kele nga marsij ko martor otvi nale nga musorsan.

Kristo etlasi Pol ko elngi nosþen nga mñirres rene nevren

¹¹ Nale ngok nga musorsan eplari rene nosþen nga mñirres ne nosrövien se Atua. Rrap-surövi ni rengen. Ko nosþen ngok Atua elngi pa rene nevrek osuw nga inu bowra tweni. ¹² Inu nuwra erres tevi Iesu Kristo, Numal se kerr, nga mñilai derteren tevi inu, ko mñilesi inu mosorsan nga botori majingen sen. ¹³ Tuwi, nomok-rij esij tere ni, nomok-oji jinibb sen nir, ko nomok-loli esij tevir. Ko iok erpe nuloli esij tevi ni mawos. Ko erres kobbong, ni ornge esij suri inu, suri inu sete nurongwose nanu nga nomok-loli nir, ko sete nuosuri re wosenen. ¹⁴ Ko merrenien se Numal se kerr emejivjiv nawon ko elai nosurien ko merrenien nga morivi se kerr kokorti vajin tevi Iesu Kristo. ¹⁵ Ko nale ngel nga muwrai Iesu Kristo mivini iel ngatan nga ñila mauren tevi jinibb nga marsij evi nale weretunen, nga kerr rraposuri ko wor tetajer.

Ko inu nusij wor asi nir ngok. ¹⁶ Ko Iesu Kristo etlasi inu suri emrreni piviseni rrongi rene inu nolon nga mipriv torrlai tevi jinibb nir nga nir kele para-osuri ni, nga para-tor sweri mauren nga puto tuwi ngok vini. ¹⁷ Atua evi Numal ne tuwi ngok vini nga mauren sen sete

orongwos pusuw nabong san. Evi Atua nga sete rramrongwos rraplesi; esan kobbong evi Atua. Rrapsusture ko wor nisen pian mare, ko rrapsturövi lelingenok ko pian pijpari tuwi ngok vini. Amen.

¹⁸ Belai nale ngel tevim, natuk Timoti, nga pusersan tevi nale se Atua nga marwerai pae womu piplari suri nik. Kuptori totkoni nale ser nir, puloli norrorrmien som puto p̄iterter nga kupbböt totkoni nanu nga marsij nir. ¹⁹ Kupmetmete nosurien som p̄irres, ko kupmetmet kele nga norrorrmien som sete pubbujbbuj, ko kupiel lingi sel nga m̄isij pivesane. Jinibb sopor sete arloli erpok, ko arlokloksi pa nosurien ser osuw. ²⁰ Renge laru ngok nuru Aemenaes ko Aleksanda, nuru orloli pa esij erpok, ko nulngi pa nuru re derteren se Demij nga porlinglingi murrun ne nale nga m̄isij.

2

Loten

¹ Nale suk nga womujnen nga kupwerai p̄iterter tevi nir, ngel: nga nir parlot ko wor pilep tevi Atua suri jinibb nir. ² Ko parlot reenge loten lele nir suri numal nir ko jinibb nga marlelep nga martori totkoni vanu nir, nga Atua purongwos p̄ilik tevir reenge majingen ser; ko nga rraprongwos rraplik reenge liken nga mumolmol m̄irres, ko nga rraprongwos rraplot tevi Atua ko nga rraprongwos rrapvijuri murrun jikle nga m̄irres. ³ Murrun ne loten nga mirpok erres p̄elak, ko ololi Atua nga m̄ila mauren tevi kerr

orngge erres. ⁴ Suri ni emrreni ãila mauren tevi jinibb totoklai, ko nga parlesi wose sev nga mivi weretunen. ⁵ Atua esan rres kobbong. Ko jinibb san esan rres kele nga ñilik livö e Atua ko jinibb nir, evi Iesu Kristo nga mivi jinibb. ⁶ Ko ni elngi mauren sen nga puloli lilane sel nga pujri lweni jinibb jijle nir rengen. Iok eviseni erres reнге daron momsawos nen nga Atua mimrreni ãila mauren tevi jinibb totoklai. ⁷ Ko Atua okoni inu erpe aposol nga bowra tweni nanu ngok. Nuwretun, sete nukerkeris; majingen suk evi nga bevisviseni jinibb ne vare nir murrun ne nosurien nga mivi weretunen. ⁸ Renge lat jijle, numrreni jinibb nir parlik malum nga lolaren ko laten pijki jir, ko nga parsusi nevrer paran mare ko parlot loten nga mumomsawos vajin tevi Atua.

Murrun momsawos se nesevin nir

⁹ Renge murrun ngok kele, numrreni nesevin nir paruri nijor ser nir reнге sel nga ñirres, sete parkowkowrir nga parlokloksi mete jinibb nir. Ko sete parlokloksi daron pilep nga parviri batur. Ko sete parlokloksi nevöt pilep nga parwuli gol, rreknga nevöt nen nga marok-lai lolo botrrum, rreknga sunsun nga nowlin mian mare ãelak. ¹⁰ Ko parjoroï lweni nir sete tevi sunsun ko tevi majingen nga marres. Suri ngok evi murrun momsawos se nesevin san nga muwra ni evi kalesia nesevin san. ¹¹ Nesevin parlik malum reнге Naim On, ko parloli norrormien ser pian ngatan nga parongrongwos. ¹² Nomok-wer ore nesevin nir nga sete parok-visviseni jinibb nir

rengē Naim On, ko sete paran mare re norman, ko parlik malum kobbong. ¹³ Suri tuwi jer pa, Atua ololi Atam womujnen, ko vitunen ea-loli Iv. ¹⁴ Ko sete Atam ko nga murnge nale gerisen nen, ko vinnen ko ornge nale gerisen nen, ko otor otvi nale nesesreien se Atua. ¹⁵ Ko sel san otoa nga Atua p̄ilai mauren tevi nesevin nir rengen, suri nesevin arvesi bipi. Ko nesevin parrul totoni kele ko wor nosurien ser ko merrenien ser ko paron p̄irres, sete parkowkowrir.

3

Murrun se jinibb nga marlelep se kalesia

¹ Nale ngel evi nale weretunen: ‘Porō nga san emrrēni pivi jinibb nga pilep se kalesia, ko ni emrrēni majingen nga m̄irres p̄elak ngok.’ ² Mernen sel sen p̄irres kemkamē ko wor, pimrrēni temijpal nesen sen ko sete puoji nesevin m̄inij;^A sete pivi jinibb nga pokminmin; pokmetmet lweni ni ko murrun puwokwok p̄irres. Ni p̄ir ko wor nga p̄ilai jinibb neturvitan paran jin. Ko ni purongwos p̄iwerwer kele. ³ Jinibb ne minminen ko jinibb ne balpalen sete putori majingen ngok. Pivi jinibb nga nolon mumolmol, sete mokkarkar, ko sete norrorrmien sen puto p̄elak rengē nevöt. ⁴ Ko pivi kele jinibb nga purongwos pimmetmet metka sen nir ko puloli natun nir parosuri ni nga parunge

^A **3:2** Erpe iel, Pol owra ‘Nesen sen pisansan kobbong’, ko rengē nale se m̄eri Gris nir, ngok erpe ßetile nale san nga mining nen erpe nga namlingi, ‘pimrrēni temijpal nesen sen ko sete puoji nesevin m̄inij.’

drrelan. ⁵ Poro jinibb san sete purongwose sel nga pimetmete metka sen nir rengen, ko pia-metmete kalesia nir pirpese ko? ⁶ Ko jinibb nga mia-ivi taol kalesia bbong sete orongwos putori majingen ngok, suri nolon turow ðelake, ko Atua tia-tor vitrangi tirpe pia-tor vitrangi Demij. ⁷ Ko jinibb nga putori majingen ngok kele pivi wor jinibb san nga jinibb ne vare nir parwerai pirpel: ‘O, ñerel evi ñer nga ñirres ðelak.’ Ko re murrun ngok puloli nisen sete orongwos ðisij, ko sete orongwos pivitan re nimet nga Demij ñilngi.

⁸ Ko re murrun ngok kele kobbong, jinibb nga marlai majingen nga marmajing se kalesia nir, parmomsawos ðirres ko parvijuri nale nga marok-werai ðirres, sete parok-mini ðelak norro rreknga nuwi nga ñiterter, ko sete parmerreni ðelak nevöt. ⁹ Ko parosuri ðiterter nale weretunen ngok rengen murrun ne nosurien nga Atua miviseni pa musuw, nga sete nanu san pubbujbbuj rengen norrorrmien ser suri. ¹⁰ Ko kalesia nir parrowrrow lesi lartul nga marwera parlai majingen ngok nir puwomu, ko poro parviter, kalesia nir arongwos para-susture nir vajin. ¹¹ Ko nesen ser kele parmomsawos ðirres, ko sete parworworsur, ko sete parok-minmin, parivi nesevin nga parok-majing tetajer suri norrorrmien ser ðirres. ¹² Lartul ngok nir parmerreni temijpal nesen ser nir, ko sete paroji nesevin ñinij.^B Ko parivi jinibb nga

B 3:12 Erpe iel, Pol owra ‘Nesen ser pisansan kobbong’, ko rengen nale se ñeri Gris nir, ngok erpe ðetile nale san nga mining nen erpe nga namlingi, ‘parmerreni temijpal nesen ser ko sete puoji nesevin ñinij.’

parongwos parmetmete natur nir ko metka ser nir p̄irres. ¹³ Nir nga marmajing m̄irres renge majingen ngok, niser orongwos pian mare ko norrormien ser orongwos p̄iterter kele wor nga parrul totkoni murrun nga marosuri m̄irres Iesu Kristo.

Kerr kalesia rramtori totkoni weretunen se Atua

¹⁴ Timoti, daron nga moli naul ngel tevim, nomok-rrorrm̄i rreknga sete mia-periv nga bevinuk belesim iok. ¹⁵ Ko poro sete bevinuk pingavil, ko naul ngel evi nga puwrai visviseni murrun nga marsorsan nga rraptori, kerr nga rramivi kalesia se Atua nga mimaur. Kerr kalesia rramivi pa metka se Atua, ko rramtori totkoni weretunen oto erres.

¹⁶ Ko weretunen, nale nga miteptepi suri Kristo renge murrun ne nosurien se kerr ean mare elep. Arsuṣuṣe erpel: Kristo ngel, Atua ololi eplari ko evi jinibb erpe kerr nga rraprongwose ni. Ko Nem̄in On ewilwil sen nga muwra, ‘Mernen le ngel.’ Ko anglo sen kele arlesi ni. Jinibb ne vare nir arunge nosṣen nga m̄irres sen, ko jinibb ne iel ngatan nir arosuri ni. Ko Atua elai ni vajin ean elik tevi renge melrin.

4

Nevisvisenien gerisen

¹ Nem̄in On owrai tweni pa osuw nga daron nga iel ngatan putomori pusuw, jinibb sopor arongwos parlinglingi murrun ne nosurien ser renge Atua, ko parosuri nem̄in ne gerisen kob-bong nir. Ko demij parongwos parkerkerasi

nir rengen. ² Jinibb ne gerisen ngok nir nga markerkerasi jinibb nir mirpok, setemun arunge nanu san obbujbbuj re nolor daron nga marloli m̄isij. ³ Nir parwer ore nga jinibb sete putotko, ko sete purro nanen lele. Ko Atua elngi pa nanen ngok nir nga jinibb nga marosuri ni ko marongwose weretunen parwera erres wor tevi Atua rengen ko parlai parurroi. ⁴ Nanu jijle nga Atua muloli arres kobbong; rramrongwos rrapurroi nanu jijle poro rraplot ko rrapwera ‘erres’ tevi Atua rengen. ⁵ Suri nale se Atua ko loten nga mirpok arongwos parloli nanu jijle paron p̄irres re no Atua.

Jinibb ne majingen nga musorsan se Iesu Kristo

⁶ Poro nik Timoti kopok-werai tweni nale ngok tevi tasi kerr nir, nik kupivi jinibb ne majingen se Iesu Kristo nga musorsan m̄irres. Ko nale ne nosurien ko nevisvisenien nga m̄irres nga komokvijuri pora-irpe nanen som renge kalesia mauren som. ⁷ Sete kuprunge tutunmasa gerisen nir nga marij tere nale se Atua. Ko kupp̄elak ko wor p̄iterter tweni mauren nga musorsan m̄irres nga Atua mimrreni. ⁸ Rrek erres sapon nga marp̄elak tweni nga niber p̄iterter, ko erres kele renge sel jijle nga marp̄elak tweni mauren nga musorsan m̄irres nga Atua mimrreni. Suri jinibb nga muloli mirpok orongwos purnge p̄irres renge mauren nga lelingenok ko mauren nga pia-vini vitu kele. ⁹ Nale ngok evi nale weretunen nga kerr rraposuri torrtorrlai ko wor tetajer. ¹⁰ Ko rramlingi pa norrorrmien se kerr osuw renge Atua nga mimaur, nga mokla mauren tevi jinibb

jijle nir, ko mare nen kele ela mauren tevi jinibb nga marosuri ni. Ko niko rramok-þelak milep renye majingen se kerr.

¹¹ Ko nik Timoti kuprij þiterter ko wor ko kupvisviseni nanu ngok nir tevi kalesia nir. ¹² Sete kuploli jinibb parkulu wutan renye nik suri nik kuvi mēlakel kobbong san. Ko renye nale som ma ko liken som ko merrenien som ko nosurien som ko sel nga mīrres som nga komok-loli tevi nesevin nir, puloli kupviseni sel nga mīrres tevi kalesia nir nga parvijuri. ¹³ Pian pij-pari daron nga inu bea-luwi e vini, nik kupþelak nga kopok-eve wor Naul On, ko kopok-werwer, ko kopok-visviseni nir renye nale weretunen. ¹⁴ Sete kuploli norongwosien som nga Nemīn On mīlai tevim seveling nga pa puto nawon. Arlai tevim suri nale se Atua nga propet san muwrai tweni tevim, daron nga þirterawarreng nir nga marwowomue kalesia marwilwil nga marlingi nevrer renye batum. ¹⁵ Nik kuploli wor majingen ngok ko nir, norrorrmien som puto þiterter renye nanu ngok nir, nga puloli jinibb parongwos parlesi wose nga norrorrmien som oktajer malum. ¹⁶ Kupmetmete nik, ko kupmetmet renye nevisvisenien som kele. Kuptur þiterter renye nanu ngok nir, suri poro kuploli pipok, nik kupa-loli nik lweni kupasi van re mauren, ko nir nga marunge drrelam kele.

5

Murrun nga mīrres nga þirij tevi jinibb nir

¹ Sete kupan kuprij ãiterter tevi jinibb nga ñitra, ko kuprij ma rijrijen lilane tevi ni, erpe ni evi tata som woswos kobbong. Ko kuprij tevi ñelakel nir parirpe tasim woswos. ² Ko kuprij ãirres tevi lekterwarreng nir pirpe nir arivi tasu som woswos. Ko kuprij kele tevi nesenwarreng ñelakel nir pirpe nir arivi jojim woswos, reнге sel nga muwokwok ñirres.

Murrun nga parmetmete nesevin nir nga diwen ser marmij lingir

³ Kuposuri ãirres nesevin san nga diwen sen mimij lingi ko nga metka sen san mijki nga pimetmete ni. ⁴ Ko poro natun rreknga mebbun putoe, nir ngok ko parloli wos wore majingen nga milep ngel se kalesia nir, nga parmetmete metka ser. Nir parloli ko wor pirpel, erpe parkele lweni ñelaken se nir nga marvesir nga marloli tevir. Ngok evi nanu san nga Atua ãir rengen.

⁵ Ko osorsan nga kalesia nir parmetmete nesevin nga diwen sen mimij lingi ngok ko nga metka sen arjiekie nga parmetmete ni, ko nga ñilngi norrorrmien sen muto ñiterter reнге Atua, ko nga muklu tetajer nat ñirin ko nat mupong nga Atua pokmetmete ni reнге liken sen. ⁶ Ko poro nga ni mokrrorrmilweni ni kobbong, ngok erpe niben emaur malum ko ñemñin emij pa osuw. ⁷ Nale ngok kupwera tweni ko wor tevi nesevin ngok nir, nga parloli san sete orongwos ãiwer lokloksi nir reнге. ⁸ Ko jinibb nga mumusus pimetmete metka sen mirpe tasu sen san nga diwen sen mimij lingi, eviseni nga ni setemun orrul totkoni murrun ne nosurien,

ko evan ngasu malum wore Atua easi jinibb san nga nosurien sen mijkie.

⁹ Ko renge naul ngok nga maruli tweni nise nesevin nir nga diwen ser marmij lingir rengen, nga kalesia nir parmetmete nir, kupuli bbong nise nesevin nir nga sia ser m̄iasi ngavöl ouwon (60), ko nga marmerreni temijpal diwen ser mijpari daron nga marmij lingir, ko sete maroji norman m̄inij.^C ¹⁰ Ko nir niser parres ko wor, suri nir arok-loli majingen nga marres. Nir parivi nesevin nga marres, suri artor pipi erres ejpari nga natur marlelep, ko arok-ir nga parokla neturvitan parini jir, ko parmetmete kalesia san p̄irres p̄elak poro pivini jir, ko parlai se nir nga jinibb marojir. Suri nir norrormien ser eterter pa nga parloli majingen jikle nir nga marres.

¹¹ Ko sete kupuli tweni nise nesen m̄elakel nir nga diwen ser mimij lingir. Suri daron nga norrormien ne totkoién mivini m̄iterter renger, ko taran ngasue Kristo vajin. ¹² Ko jinibb nir tarwer lokloksi nir vajin, suri arlinglingi tweni rijrijen ser nga womu, nga setemun partotko kele ko parkorti tevi Kristo p̄isan vajin. ¹³ Ko pirpok kele, tartipatun nga tarlik totrong nawon, ko tarivel karkar renge naim nir, ko tarunge lokloksi ko tarworworsur, ko tarsuþe nanu nga sete m̄irres re nir parwerai. ¹⁴ Ko niko numrreni nesen m̄elakel nir nga diwen ser marmij lingir

C 5:9 Erpe iel, Pol owra ‘Diwen sen pisansan kobbong’, ko renge nale se m̄eri Gris nir, ngok erpe ßetile nale san nga mining nen erpe nga namlingi, ‘pimrreni temijpal diwen sen ko sete puoji norman m̄inij.’

partotko kele ko wor, ko natur partoe, ko parmetmet lilane naim ser. Ko ngok puloli devje nuval se kerr sel ser pijki rrese nga parongwose parij tere kerr. ¹⁵ Nesevin nga diwen ser marmij lingir ngok sopor arivel lingi pa sel nga mimawos ko arvijuri Demij vajin.

¹⁶ Ko poro kalesia nesevin san evi sopsospen e nesevin san nga diwen sen mimij lingi, ni ko pimetmete p̄irres sopsospen ngok. Sete parloli belaken nen pian re kalesia jijle nir. Ko kalesia nir vajin para-metmete nesevin nir nga diwen ser marmij lingir ko metka ser san mijkie nga pimetmete nir.

Majingen se Birterawarrend nir nga marok-wowomue kalesia nir (elta)

¹⁷ Birterawarrend nir nga marok-wowomue kalesia nir, poro nga parmajing p̄irres, ko kalesia nir parosurir ko wor. Ko parlai kele nevöt tevir, ko ngok erpe arlai nowlir evaru ko. Parloli pipok pilep ko wor tevi nir nga marpelak milep nga marwerwer ko marvisviseni. ¹⁸ Suri Naul On owra ‘Daron nga kumlai buluk nga parbböt tututweni jelangi wit nir, kami kaploli ko wor parurroi jelangin ngok sopor, sete kapkai totkoni jingor.’ Ko nale owrai kele nga ‘Poro jinibb san puloli majingen san, erres nga ni pia-la nowlin ren ji jinibb nga mokmajing ser.’

¹⁹ Sete kaprunge nale san nga marwera ‘O, Birterawarrend ngok nga mokwowomue kalesia nir ololi esij’, poro sete nir p̄ieru rreknga p̄itul nga parwera pipok ewretun. ²⁰ Ko poro

Ĥirterawarreng ngok san puloli Ĥisij, kuprij Ĥiterter tevi renge no kalesia nir, nga puloli nir mĥinij parmetutu kele.

²¹ Inu nuwrai eterter tevim renge no Atua ko renge no Iesu Kristo tevi anglo sen nir nga ni mĥilngir pa musuw, nga kupvijuri ko wor nale suk ngok nga mĥelai tevim. Kuploli pusorsan ko wor tevi jinibb ĤetĤeti. Sete kuploli sel nga mĥiterter tevi jinibb sapor, ko sel nga mimalum tevi nir sapon kele.

²² Sete nolom pingavilvil nga kuplingi nevrem renge jinibb san nga kupsusture ni nga putori majingen san se Atua. Ko sete kupkorti tevi jinibb karkar nir nga parloli kupvitan van renge nololien ser. Kuprrul totkoni mauren som puwokwok Ĥirres.

²³ Sete erres nga nik kopok-mini nuwi kis kobbong, ko suri nik komok-mesi daron elep, ko erres nga nik kopok-mini norro beblen nga puloli lilane depaim.

²⁴ Nololien se jinibb sapor arto limjer rres, ko jinibb jikle arlesi wos pae nololien ser osuw. Ko jinibb sapor ma arloli nololien ser arto kelti, nga jinibb sete Ĥilesi wose pian pijpari nabong nga Atua pia-wera suri lat nga puto suri tevi jinibb nir. Ko iok evi batun nga mowrai sete nolom pingavilvil nga kuplingi jinibb san putori majingen san se Atua. ²⁵ Ko erpok kele, majingen nga marres kele arto limjer kobbong. Ko poro sete parto limjer womu, ko nir para-pelari ko wor nabong sapon.

6

Murrun nga mumomsawos se jinibb ne majingen nir

¹ Nir nga marivi jinibb ne majingen parosuri ko wor numal ser nir ðirres, puloli sete jinibb san purongwose ðiwer lokloksi nise Atua ko nevisvisenien se kerr, nga parwera ‘O, kalesia nir sete armajing erres’. ² Ko jinibb ne majingen nga numal ser marivi kalesia sete arongwos parloli murrun ngok nga parwera “O, numal suk erpe tuwak kobbong”, ko sete parosuri ðirres suri. Ejki, parmajing ðirres kele wor, suri arok-majing se kalesia san nga marmerreri.

Nevisvisenien gerisen ko nijor nga marres

Nanu ngok nir, kupwer visviseni ko kupwer sesesre ko wor tevir. ³ Ko si nga mivisviseni nevisvisenien mñinj nga sete musorsan tevi nale weretunen se Iesu Kristo Numal se kerr ko tevi nosurien nga mimawos mñirres, ⁴ ko mñernen sete orongwose nanu san, ko norrormien sen ean mare ðelak. Ko murrun ngok ololi arokmerreni lenglengen partertere nir re nale, ko nolor elelep, ko parsisij tevir, ko parlat, ko norrormien nga marsij ðelak parto tevir. ⁵ Ko ngok evi murru jinibb nga norrormien ser mñlengleng, ko weretunen ejki rres jir, ko niko marmerreri parlat tetajer. Ko nir arrormi nosurien se jinibb orongwos puloli sel nga putor sweri nevöt pilep.

⁶ Ko ewretun, murrun nosurien se kerr evi sel nga jinibb orongwos putor sweri nanu pilep, poro ni ðir suri sev nga muto pa jin. ⁷ Ko

kurongwose, daron nga rrampelari iel ngatan sete rramtori nanu san tevi kerr. Ko daron nga rrapluwi kele, sete rrama-tori nanu san kele tevi kerr. ⁸ Ko poro nanen se kerr putoe, ko sunsun se kerr puto kele, ngok evter pa kerr ko. ⁹ Ko p̄isij re jinibb nga marok-merreni nga joror pilep, parirpe jinibb san nga nover misrapo ore. Ko murrun nga marmerrreni joror pilep ngok e orongwos puloli parvitan p̄isij nga mauren ser pian p̄isij p̄etp̄eti. ¹⁰ Murrun nga marmerrreni p̄elak nevöt e evi batbatu murrun lele nga marsij. Ko jinibb sopor arok-vijuri sel ngok eterter, ko aran ngasue murrun ne nosurien vajin, ko arloli nanu elep nga nir kele marunge m̄isij milep suri.

Nale mawos se Pol tevi Timoti

¹¹ Ko nik, Timoti, kuvi jinibb se Atua. Kupruj ngasue nanu ngok nir. Ko kup̄elak ko wor pilep nga kuploli murrun nga musorsan m̄irres, ko murrun nga muon m̄irres, ko nosurien, ko merrenien, ko nga kuptur p̄iterter pijpari bongsin, ko nga kupivi jinibb malum. ¹² Kupwolu p̄iterter renge woluen ne nosurien, nga kuplai mauren nga muto tuwi ngok vini pivi som. Suri Atua everuse nik nga kuplai mauren ngok renge daron nga kumwerai tweni nosurien som bonevis renge no delung nir. ¹³ Ko womu ne Atua, nga m̄ila mauren tevi nanu jijle, ko womu ne Iesu Kristo nga muwra tweni nosurien nga m̄irres sen renge no Ponjes Paelet, ¹⁴ nuwrai eterter tevim nga kupvijuri nale nen nir p̄iterter, sete kupvitan re nanu san, pianan pijpari nabong

nga Iesu Kristo Numal se kerr pia-luwi kele vini rengen. ¹⁵ Kristo ngok, Atua pia-viseni ni renge daron momsawos sen. Atua ngok esan kobbong derteren sen otoa, ko jinibb jijle parsurövi ko wor, ko evi Numal se numal ngabe ngabe petpeti nir. ¹⁶ Ni esan rres kobbong nga mauren nga muto tuwi ngok vini oto jin. Ko lat nga milik ren erinrin erres, nga jinibb san sete orongwos pian mori. Atua ngok, sete jinibb san elesi wor nabong san, ko sete san orongwos pilesi. Ko kerr rrapsumsi nisen pian mare tetajer, ko rrapwerai tweni derteren sen nga puto pijpari tuwi ngok vini. Pirpok ko.

Kalesia nir nga nijor ser milep

¹⁷ Kuprij pitertter ko wor tevi nir nga nijor ser milep iel ngatan, nga sete parloli norrorrmien ser pian mare pelak, ko puto pelak renge nevöt ser. Suri rrek nevöt orongwos pijjiki kobbong. Ko nir parlingi norrorrmien ser puto renge Atua kobbong. Suri ni oklai pa nanu elep nga rraprunge pirres rengen. ¹⁸ Nik kupwerai ko wor tevir nga nir parloli majingen nga marres, ko nga parir renge majingen ngok nir piasa nga marir renge nijor ser nir. Nolor parres, ko parvijngeni joror tevi nir nga joror mijkie. ¹⁹ Re murrun ngok erpe arok-lingi lilane joror nga marres nir re melrin nga parto pitertter tetajer tuwi ngok vini. Ko parongwose vajin parlai mauren nga mivi mauren weretunen.

Bongsi nale se Pol tevi Timoti

²⁰ O Timoti, kuptor totkoni pirres nanu nga Atua milngi pa re nevrem musuw. Kupan ngasu

re nale nawon ngok nga marij tere Atua rengen, ko lenglengen se nir nga marwera evi norong-wosien, ko ejki, nir arkerkeris kobbong. ²¹ Suri jinibb elep arok-vijuri murrun ngok, nga muloli maran ngasu pa rengen murrun ne nosurien.

Ko ngel evi loten suk, nga merrenien se Atua piptevi kami jijle. Nuwra “Remsom”.

Naul On Nga Mimerr Uripiv
The New Testament in the Uripiv language of
Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

96303ce7-aa0a-513c-862d-415957a542e1